











I /  
II  
III  
IV  
V

21. 15h



- I. Mr. Johann Pollicarü wider den Bischoff zu  
Münster Historien, die er antwortet.
- II. Hauptstücklein Jacobi Westphali.
- III. Erklärung der ruffischen Städte gesandten.
- IV. Reueutung D. Georgii Majors, bei den Euten worden.
- V. Der 125 Psalmen in kleinen Jung M. Hieron. Reueutung.

52

126 13.

EX LIBRIS  
ILLVSTRISSIMI VIRI,  
DN. DAN. LVDOLPHI,  
LIB. BAR. de DANCKELMANN,  
S. REG. MAI. BORVSS. CONSILIARII  
STATVS INTIMI, cetera,  
BIBLIOTHECÆ ACAD. FRIDERICIANÆ  
TESTAMENTO RELICTIS.



# Wider des Bischoffs

zur Raumburg vnchristlich vnd

verfürisch Buch / oder newe I N

T E R I M, jetzt dis Jar

zu Cölln im Druck

ausgangen. *Petrus à Ferra*

Erste Antwort. *Seruest- Anbaltung.*

Ob es denn war sey / wie der Bischoff vnd  
Papisten / ewig vnd on auffhören liegen vnd trie-  
gen / Nemlich / das sie die rechte / alte / Catholi-  
sche / Christliche Kirche sein ?

Item / Ob es den war sey / wie der Bischoff  
vnd die Papisten / ewig vnd on auffhören liegen  
vnd triegen / vnd vns vnd vnserre Lehre damit le-  
stern vnd schenden / Nemlich / das wir Ketzer  
vnd die newe Kirche sein / von der rechten / al-  
ten / Catholischen / Christlichen Kirchen abge-  
fallen / Drumb denn auch sie vnd der Bischoff /  
vns Donatisten schelten / vnd Winckelhauffen  
vnd Winckelrotten nennen ?

M. Johannes Pollicarius Pfarher  
vnd Superattendens zu Weissenfels.

M. D. LXII.

Faint, illegible text at the top of the page, possibly bleed-through from the reverse side.

Faint, illegible text in the middle section of the page.

KÖN. PR. FR.  
UNIVERS.  
ZVHALLE

Jf 2711

Faint, illegible text at the bottom of the page.



**Wider des Bischoffs**  
**zur Raumburg vnchristliche Buch /**  
oder neue INTERIM, jetzt new-  
lichst dis Jar zu Cölln im  
Druck außgan-  
gen.

**Erste Antwort.**

Johannes Pollicarius etc.

**S** Wer die vielfeltigen vnd vnze-  
lichen / Teuffelischen Lügen vnd Ca-  
lumnien / damit ich / Gott sey lob / teg-  
lich beschwert werde / ist vor dieser  
zeit / vnd auch newlichst jetzt / nicht von gerin-  
gen Leuten / eine neue auff die bahn kommen /  
vnd schier durchs gantze Land erschollen / wel-  
che denn auch mir vnd andern Gottsfürchtis-  
gen Hertzen am tieffsten zu gemüte gangen /  
vnd am sehrsten betrübet hat / als solte ich nem-  
lich / dem Bischoff zu Zeitz einen Fußfall ge-  
than / meine vorige wider ihn ausgegangene  
Büchlein vnd Schrifften retractirt vnd wider-  
ruffen / mich mit im versönet / vnd vmb verzei-  
hung vnd gnad gebeten haben.

A ij

Dar

Darauff antworte ich / vnd bitt man wölle  
mir diese vnhöfliche wort verzeihen / weil es  
nicht meine Person allein / sondern Gottes mei-  
nes HERN Ehr / mein Ampt / Bekentnis / vnd  
die Wahrheit selbst antrifft / Vnd sage also / wer  
Er auch ist / der solche Lügen von mir so felsch-  
lich ertichtet / vnd vnter die Leute ausbracht  
hat / das derselbige mich öffentlich wider sein  
Hertz vnd Gewissen anleuget.

Es ist mir mein lebenlang in meinen sinn  
nicht kommen / vnd bitt Gott / Er wolle mich  
durch seinen heiligen Geist behüten vnd bewa-  
ren / das mirs auch hinfürder die zeit meines le-  
bens nicht in meinen sinn komme.

Denn was were das anders / denn die er-  
kandte Wahrheit wissentlich verleugnet / von  
Christo vnd seiner lieben Kirchen abgefallen /  
vnd den Teuffel selbst / in seinen Gliedmassen  
Papist vnd Bischoffe angebetet / welchs mir  
würde zuschwer werden.

Derhalben bin ich nochmals vnd auff's  
new mein bekentnis zu thun / vnd die Peps-  
schen vnd Antichristischen Greweln vnd Ir-  
thumb in Buch des Bischoffs / so viel Gott  
gnade geben wird / zu widerlegen bedacht /  
welch Buch er newlich jetzt dis Jar / zu Cölln  
im öffentlichen Druck hat ausgehen lassen / dar-  
innen er sich vnuerholen vnd offenberlich einen  
Wolff



hafftigen Rhum/ das sie allein die Kirche sein/  
auch allein die warhafftigen Zeichen der rech-  
ten Kirchen haben/ Denn wie sie rhümen/

1. So sein sie erstlich allein die Catholici.

2. Zum andern / haben sie auch allein das  
rechte Zeichen der Kirchen vnter sich noch vn-  
zertrent/nemlich die Einigkeit.

3. Zum dritten/so sein sie auch der ankunfft  
halben elter denn wir / sintemal sie nicht von  
noch aus vns / sondern wir von vnd aus ihnen  
kommen vnd ausgegangen sein.

### Vierde Antwort.

Von der Rechtfertigung des Menschens/  
welcher Artickel vnd Punct/ wie man sagt / der  
beste sein sol im gantzen Buch / mit anzeigung/  
was in demselbigen vnrecht/falsch / vnd streff-  
lich sey.

Sampt einem Kurtzen Appendice, etlicher  
anderer irrigen stücke halben / im ersten teil sei-  
nes Buchs ꝛc.

### Fünffte Antwort.

Vom preis der heiligen Schrift / wider  
die ertichten vnd selbst erwelten Gottesdienste  
vnd Menschen Satzungen in gemein / so die  
Pepste vnd Bischoffe / wider dieselbige in die  
Kirche Gottes haben eingefurt / welche im  
dritten

dritten Teil dieses Buchs / vom Bischoffe ver-  
theidiget vnd rechtfertiget werden.

### Sechste Antwort.

Von etzlichen Menschen Satzungen vnd  
eigenen eruelten Gottesdiensten in sonderheit/  
welche er setzt vnd erzelt im ende des dritten  
Teils seines Buchs / als von der Vorbitt vnd  
Anruffung der verstorbenen Weiligen / vom  
Segfrewer / Cresam / vom Fasten vnd Coelibat/  
oder Ehe vnd Speisauerbot / Sieben gezeiten/  
vom Primat des Papsts / begengnis der Ver-  
storbenen / Vigilien / Einer gestalt des Sac-  
raments / ꝛc.

### Siebende Antwort.

Von den sieben Sacramenten / von der  
Taufe / Firmunge / Busse / vom Sacrament  
des Altars / von der Ordination oder Weihe/  
von der Ehe / von der letzten Delung etc.

### Zum achten.

Glossa / von Blat zu Blat / vber den Text  
des gantzen Buchs / in welcher Glossa viel  
notwendiger stücke angezeiget werden sollen/  
so in den vorigen Schrifften / nichtfüglich ha-  
ben verlegt oder vermeldet werden können.

Zum

## Zum neunnden.

An alle Pfarherrn/ Vnterthanen vnd Verwandten des Stiffts Naumburg / Christliche Ermanung/ 2c. Sonderlich weil man sagt / das der Bischoff noch mit andern dergleichen Büchern schwanger gehe / eins teils auch allbereit vnter der Press haben sol.

Hütet euch für den falschen Propheten / die zu euch kommen in Schaffskleidern / inwendig aber sind sie reissende Wölffe / An jren Früchten solt jr sie erkennen / Matth. 7.

Wir wollen nu in Gottes Namen zum handel greiffen / vnd die Deuptsache dieser ersten Antwort für vns nemen / vnd aus den Schrifften D. Martini Luthers seligen berichten / Erstlich von der alten rechten Kirchen / was / wo / vnd wer sie sey / vnd worbey man sie erkennen sol / Vnd denn widerumb von der newen falschen Kirchen / was / wo / vnd wer sie sey / vnd worbey man sie erkennen sol. Denn die sache / wie gehört / darumb vns die Papisten vnd der Bischoff Ketzer schelten / ist diese / das sie fugeben / wir sein von der heiligen Kirchen gefallen / vnd haben ein andere newe Kirche angericht.

Dierauff ist also zu antworten / spricht Lutherus / Nemlich / weil sie sich selbs rühmen / sie sein die Kirche / so sind sie schuldig dasselb zu beweisen /



weisen / Wenn sie das mit einigem grund ( be-  
geren nicht viel gründe ) beweisen / so wollen  
wir vns gefangen geben / Kommen vnd sagen /  
Peccauimus miserere nostri. Wo sie es aber nicht  
können beweisen / so müssen sie bekennen ( sie  
thuns gern oder vngern ) das sie nicht die Kir-  
che sind / vnd wir nicht Ketzer sein mögen / das  
wir von der nichtigen Kirchen fallen. Ja weil  
da kein mittel ist / so müssen wir die Kirche Chri-  
sti / vnd sie des Teuffels Kirche sein / oder wider  
umb. Darumb ligt es gar an dem Puncten / das  
man beweise / welches die rechte Kirche sey /  
So lange die beweisung nicht da ist / so ist es  
vergeblich / das sich ein teil die Kirche rühmet /  
vnd das ander teil Ketzer schilt / ein teil mus  
falsch vnd vnrecht sein.

Dennes sind zweierley Kirchen / von der  
Welt an / bis zum ende / die Sanct Augustinus  
Cayn vnd Nabel nennet / Vnd der Herr Chri-  
stus gebent vns / das wir nicht die falsche Kir-  
che annemen sollen / vnd vnterscheidet selbs  
zwo Kirchen / eine rechte vnd falsche / Matth. 7.  
Wütet euch für den falschen Propheten / die zu  
euch Kommen in Schaffskleidern zc. Wo Pro-  
pheten sind / da sind Kirchen / darin sie lehren.  
Sind die Propheten falsch / so sind die Kirchen  
auch falsch / die den Propheten glauben vnd  
folgen.

B

Nun

Nun haben wir bis daher / noch nie k<sup>ö</sup>n-  
nen von den Papisten erlangen / das sie bewei-  
sen wolten / Warumb sie doch die rechte Kir-  
che seien / Sondern stehen auff dem Spruch/  
Matth. 18. Man sol die Kirche hören / oder  
müsse verloren sein. So doch Christus daselbst  
nicht saget / Wer / Wo / oder was die Kirche  
sey / Sondern wo sie ist / da sol man sie hören.  
Das bekennen vnd sagen wir auch. Aber wir  
fragen / Wo vnd wer die Kirche Christi sey?  
Non de Nomine, nicht vom Namen / sondern  
vom Wesen fragen wir.

Gleich als wenn ich einen Trunckenen/  
halbschlaffenden / oder einen Narren fragte/  
Lieber sag mir / Wer / oder wo ist die Kirche?  
Vnd er mir zu zehen malen nichts anders dar-  
auff antwortet / denn also / Man sol die Kirche  
hören. Wie sol ich doch die Kirche hören / so ich  
nicht weis / Wer vnd wo sie ist.

Ja sagen sie / wir Papisten sind blieben in  
der alten vorigen Kirchen / seid der Apostel ze-  
iten her / Darumb sind wir die rechten / aus der  
alten Kirchen kommen / vnd bis daher blieben /  
Ihr aber seid von vns abgefallen / vnd eine neue  
Kirche worden wider vns. Antwort / Wie aber /  
wenn ich beweiset / das wir bey der rechten al-  
ten Kirchen blieben / Ja das wir die rechte alte  
Kirche sein / Ihr aber von vns / Das ist / von  
der

der alten kirchen abtrünnig worden / ein newe  
Kirchen angericht habt / wider die alte kirche  
Das last vns hören.

Erstlich wird das niemandt leugnen kön-  
nen / das wir so wol als die Papisten / herkom-  
men aus der heiligen Tauffe / vnd Christen aus  
derselben genennet sind. Nun ist die Tauffe  
nicht ein Neues / noch zu dieser zeit von vns  
erfunden / sondern es ist eben dieselbige Alte  
Tauffe / die **C**H**R**I**S**T**E**S eingesetzt / dar-  
in die Apostel vnd erste Kirche / vnd alle Chri-  
sten / bis daher getaufft sind. Haben wir nun  
dieselbige Tauffe / der ersten alten (vnd  
wie im Symbolo stehet) Catholica, das ist / der  
gantzen Christlichen Kirchen / vnd sind eben  
in derselben getaufft / So gehören wir ge-  
wislich in dieselbe Alte vnd gantz Christliche  
Kirche / die mit vns gleich / vnd wir mit ihr  
gleich aus einerley Tauffe herkommen / vnd  
ist der Tauffe halben kein vnterscheid. Die  
Tauffe aber ist das fürnembste vnd erste Sa-  
crament / on welche die andern alle nichts sind /  
wie sie bekennen müssen.

Darumb können vns die Papisten / nicht  
mit Wahrheit ein andere oder newe kirche schel-  
ten oder ketzern / weil wir der alten Tauffe kin-  
der sind / so wol als die Apostel selbs / vnd die

B ij

gantze

gantze Christenheit / Ephes. 4. einerley Tauffe.

Zum andern / wird das niemand leugnen / das wir das heilige Sacrament des Altars haben / gleich vnd eben wie es Christus selbs eingesetzt / vnd die Apostel hernach / vnd die gantze Christenheit gebraucht haben / vnd essen vnd trincken also / mit der Alten vnd gantzen Christenheit / von einerley Tisch / vnd empfahen mit jnen dasselbig einerley alte Sacrament / vnd haben darin nichts newes noch anders gemacht. Derhalben wir mit jnen einerley Kirchen / oder wie S. Paulus / 1. Corinth. 11. Einerley Leib / einerley Brod sind / die wir von einerley Brod essen / vnd einerley Kelch trincken.

Darumb vns die Papisten nicht können Ketzer / oder die neue Kirche schelten / sie müssen zuuor Christum / die Aposteln / vnd die gantze Christenheit Ketzer schelten / wie sie denn auch in der Wahrheit thun. Denn wir sind mit der alten Kirchen einerley Kirchen / in einerley Sacrament.

Zum dritten / kan das niemand leugnen / das wir die rechten alten Schlüssel haben / vnd sie nicht anders brauchen / denn zu binden vnd zu lösen die sünde / so wider Gottes gebot geschehen / wie sie Christus eingesetzt / die Apostel vnd gantze Christenheit gebraucht hat / bis da her. Haben also einerley Schlüssel vnd brauch /  
mit

mit der alten Kirchen/darumb wir eben diesel/  
bige alte Kirche sein/oder je drinnen. Denn wir  
machen keine neue Schlüssel/machē nicht new  
Gesetze / schliessen damit auch nicht Könige  
vnd Herren aus/ vnd ire weltliche Herrschaff/  
ten / Sondern allein die Sünder / aus vnd in  
das Himelreich/ gleich wie die alte Kirche ge/  
than hat/ aus befehl des HERREN. Das  
vns die Papisten abermal felschlich anliegen/  
Ja die alte Kirche / Aposteln / vnd Christum  
selbs in vns ketzeren vnd lestern.

Zum vierden/Kan das niemands leugnen/  
das wir das Predicamt vnd Gottes Wort  
rein vnd reichlich haben / fleissig lehren vnd trei/  
ben/ on allen zusatz/ newer / eigner / Menschli/  
cher Lehre / gleich wie es Christus befohlen  
hat / die Apostel vnd gantze Christenheit ge/  
than. Wir erdichten nichts neues/ sondern hal/  
ten vnd bleiben bey dem alten Gottes Wort/  
wie es die alte Kirche gehabt / Darumb sind  
wir mit derselben/die rechte alte Kirche/als ei/  
nerley Kirche/die einerley Gottes Wort lehret  
vnd gleubet.

Darumb lestern die Papisten abermal  
Christum selbs/ die Apostel vnd gantze Chri/  
stenheit/ wenn sie vns neue Kirchen vnd Ke/  
tzer schelten. Denn sie finden nichts bey vns /  
denn allein das Alte / der alten Kirchen / das

wir derselben gleich / vnd mit jr einerley Kirche  
sind.

Zum fünfften / Kan das niemand leugnen/  
das wir der Apostel Symbolum, den alten Glauben  
der alten Kirchen / aller Dinge gleich mit ihr  
halten / Glauben / Singen / Bekennen / nichts  
newes darinnen machen noch setzen / Damit  
wir in die alte Kirche gehören / vnd einerley mit  
jr seind.

Darnach laßt vns dis stück auch nicht von  
den Papisten mit Wahrheit gescholten werden/  
als Ketzer / oder neue Kirche. Denn wer mit der  
alten Kirchen gleich glaubt / vnd gleich helt / der  
ist von der alten Kirchen.

Zum sechsten / Kan das niemand leugnen/  
das wir mit der alten Kirchen ein gleich Ge-  
bet / dasselbig Vater vnser haben / kein Newes  
noch anders erdichten / dieselben Psalmen sin-  
gen / mit eintrechtigem Munde vnd Hertzen  
Gott loben vnd dancken / gleich wie es Christus  
gelehret / die Apostel vnd alte Kirche selbst ge-  
braucht / vnd vns dem Exempel nach zu thun  
befohlen.

Darumb die Papisten hinfürder abermal  
vns nicht können ketzern / noch neue Kirchen  
schelten / sie müssen Christum zuuor selbs schel-  
ten / sampt seiner lieben alten Kirchen ꝛc.

Zum siebenden / Kan niemand leugnen / das  
wir

wir mit der alten Kirchen lehren vnd halten /  
Man solle die weltlichen Herrschafften ehren /  
vnd nicht verfluchen noch zwingen / dem Papste  
die Füße zu küssen. Solches haben wir auch  
nicht auff's newe erdichtet / Sondern S. Pe-  
trus 2. Pet. 2. verflucht die / so solches New er-  
finden / vnd künfftig thun würden. Vnd S. Pau-  
lus zum Rom. Cap. 13. stehet bey vns / vnd die al-  
te vnd gantze Christenheit.

Das wir hierin auch nicht newe ding sein  
oder heissen mögen / wie die Papisten Gott selbs  
in vns lesteren / sondern sind vnd gehören in die  
Alte / Heilige / Apostolische Kirche / als die  
rechten Kinder vnd Glieder derselben. Denn  
wir vnser Oberkeit / es sey Keiser oder Fürsten /  
allezeit auff's treulichst gehorsam zu sein / gele-  
ret / selbs auch also gethan / vnd hertzlich für sie  
gebeten.

Zum achten / Kan niemand leugnen / das  
wir den Ehestand loben vnd preisen / als ein  
Göttlich / gesegnet / vnd wolgefellig Geschöpffe  
vnd Ordnung zu der Leibes frucht / vnd wider  
die fleischliche vnzucht. Vnd haben den nicht  
auff's new von vns ertichtet / Auch nicht den  
brauch desselben aus vns / auff's new erdacht /  
viel weniger / als newe Lerer verboten / sondern  
gleich / wie den Gott von anbegin geschaffen /  
Christus bestetigt / vnd die Apostel vnd Alte  
Kirche

Kirche geehret vnd geleret haben / in derselben  
alten Regel / vnd Gottes Ordnung sind wir blie  
ben / vnd damit der alten Kirchen ehnlich / ja  
eben derselben artige Glieder sind. Das man  
hie sibet / wie die Papisten abermal felschlich  
vns Newrung aufflegen.

Im neunnden kan niemand leugnen / das  
wir eben das selbig leiden ( wie S. Petrus sagt )  
das vnser Brüder in der Welt haben. Da ver  
folget man vns an allen örten / da erwürget / er  
treickt / erhencft / vnd leget vns alle Plage an /  
vmb des Worts willen / vnd gehet vns gleich  
wie der alten Kirchen.

vnd sind in dem derselben vber die masse  
gleich / das wir wol mögen sagen / Wir sind die  
alterechte Kirche / oder je jr Mitgenossen vnd  
gleiche Gesellen im leiden. Denn wir solches  
nicht erdichten auff's Newe / sondern fürens  
wol. Ja wir sind ( wie dieselbige alte Kirche  
auch ) dem HERN Christo selbs am Creutze  
gleich.

Da stehet für dem Creutze / Hannas vnd  
Caiphas / sampt den Priestern / vnd lestern den  
HERN darzu / vber das sie in gecreutziget  
haben / gleich wie vns der Papst / Cardinel vnd  
Mönche verurteilet / verdampft / ermordt / vnd  
vnser Blut vergossen haben / vnd lestern vns  
noch darzu.

Da



Da stehen die Kriegsleute / das ist / der weltlichen Herrschafft zum theil / vnd lestern vns auch. Darzu auch der Schalck / der lincke Schecher / D. W. sampt den seinen / den Gott schon verurteilt / in banden zur Dellen gehenckt hat / mus sein lestern auch darzu thun / das disstück als ein alt zeichen der alten Kirchen / reichlich an vns gesehen wird.

Zum zehenden / kan niemand leugnen / das wir nicht widerumb auch Blut vergiessen / morden / hencken / vnd vns rechen / wie wir oft wol hetten gethan / vnd noch thun könten / Sondern wie Christus / die Apostel vnd alte Kirche gethan / dulden wir / vermanen / vnd bitten für sie / auch öffentlich in den Kirchen / Litanien / vnd Predigten / aller dinge / wie Christus vnser LXXX gethan vnd gelehret / die alte Kirche auch also / Das wir hierin auch alle / des alten Wesens / der alten Kirchen vns halten.

Weil nun die Papisten wissen / das wir in allen solchen stücken / vnd was deren mehr sind / der alten Kirchen gleich sind / vnd mit Wahrheit die alte Kirche heissen mögen / denn solche stück nicht new sind / noch von vns erfunden / Ists wunder / warumb sie vns so vnuerschampt dörfen beliegen / vnd verdammien / als die von der Kirchen gefallen / vnd ein neue Kirche angesichtet haben / So sie doch nichts neues an

C

vns

vns finden mögen / das nicht in der Alten vnd  
rechten Kirchen / zu der Aposteln zeiten gehalten  
sey.

Das ich furwar achte / dis sey die zeit / da  
von Daniel. 7. sagt / Der alte (Antiquus dierum,)  
satzt sich / nach dem das kleine Dorn ausgeles  
stert hatte / vnd das Gericht gehalten. Denn  
die vorige alte Kirche leuchtet wider herfür /  
(wie die Sonne nach den Wolcken / hinder wel  
chen doch dieselbe Sonne war / aber nicht hel  
le) vnd das Lasterhorn wil vndergehen / vnd al  
les ein ende werden / wie daselbst stehet / vñ das  
werck sich zeigt / darvon hie nicht zu handeln.

Möcht aber jemandts sagen / es felht noch  
an einem / nemlich an Fasten / Denn jr Ketzer  
fastet nicht (sprechen sie) Ah Herr Gott / Ist  
ein stück an vns von der alten Kirchen / so ist's lei  
der die Fasten / Ist ein stück an den Papisten / von  
der newen Kirchen / so ist's das sie nicht fasten /  
vnd im sause leben auch auff den Fasttagen / ehe  
denn auff den Feirtagen. Ja wir fasten nicht al  
lein / sondern leiden (mit S. Paulo) hunger / wel  
ches wir wol an vnsern armen Pfarherrn / iren  
Weiblin vnd Kindlin teglich sehen / vnd andere  
viel Armen / den der Hunger aus den augen si  
het / kaum das Brod vnd Wasser haben / vñ dar  
zu fingernacket gehen / kein Eigens haben.

Der Bawer vnd Bürger gibt nicht / der  
Adel

Adel nimpt / Das vnser wenig find / die etwas  
haben / vnd doch nicht allen helfen können ( da  
soltten Stifft vnd Clöster zu dienen ) so geitzen  
die andern / mus also Lazarus hungers sterben /  
des lachen die Papisten. Aber damit zeugen sie /  
das wir die alte Kirche sein / die von den Teuffels  
Kindern den spott zum schaden leiden.

Miemit haben wir nun beweiset / das wir  
die rechte alte Kirche sind / mit der gantzen heil  
ligen Christlichen Kirchen / ein Körper vnd eine  
Gemeine der Heiligen. Beweiset nun auch jr  
Papisten / das jr die rechte alte Kirche / oder jr  
gleich seid / aber das köndt jr nicht thun. Son  
dern ich wil beweisen / das jr die newe / falsche  
Kirche seid / die immer von der Alten abtrün  
nig / des Teuffels Dure vnd Schule ist wor  
den.

### Von der newen falschen Kirchen /

Was / Wo / vnd wer sie sey / vnd wo  
bey man sie erkennen sol.

**E**rstlich bleibet jr nicht bey der ersten alten  
Taufte / denn jr habt euch auffs newe viel  
andere Taufte erdichtet / Vnd lehret / die er  
ste Taufte sey durch Sünde hernach verloren /  
man müsse genug thun durch eigene Werck /  
Sonderlich durch Clösterrey werde man so  
rein / als gienge einer aus der T A U F T E  
C ij Chris

Christi. Daher jr die Welt voll Kirchen vnd  
Clöster gemacht.

Vnd dis stücke / die Satisfactio, Gnugethu-  
ung / ist der Anfang vnd der Ursprung / Thür  
vnd Eingang zu allen Greweln im Papstumb /  
Gleich wie in der Kirche die Tauff der Anfang  
vnd Eingang ist zu allen gnaden vnd vergebung  
der sünden / Denn wo die Tauffe nicht ist / da  
hilfft Sacrament / Schlüssel vnd alles nicht.  
Wo die Gnugethuung nicht entstanden were / so  
were Ablass / Wallart / Bruderschaft / Messe /  
Fegfewr / Closterey / Stifte / vnd das mehrer  
teil aller Grewel nicht erfunden / vnd das Pap-  
stumb nicht so dick vnd fett worden.

Darumb haben sie dieselbe wol eine Tauf-  
fe in irer Kirchen genennet / die viel Tauffen /  
Sacrament / vnd Vergebung der sünden / ja  
auch hohe Heiligkeit gewirckt hat. Das ist sie /  
die eigen Berechtigkeith / die Werckheiligkeit /  
dauon wir viel geschrieben. Wer hat euch be-  
fohlen ? oder wo stehets geschrieben ? Wo fin-  
det jr in der alten Kirchen / das jr solche neue  
Tauffe vnd Heiligkeit erdichten möget. Wer ist  
hie Ketzer / abtrünnig vnd neue Kirche ?

Zum andern / Habt jr den Ablass in alle  
Welt getrieben / als eine Tauff / ja als eine sind-  
flut / das sünde abwasche. Das kein Winckel ist  
in der Welt / da ewer Ablass nicht hin verkauft  
oder

oder gegeben ist / alle Welt voll Siegel vnd  
Brieffe. Wer hats euch befohlen / oder wo ste-  
het es geschrieben? Wo findet irs in der alten  
Kirchen / das ir solche newe Tauffe vnd abwa-  
schung der sünden möget stifften? Wer ist hie  
die ketzerische newe Kirche? seid ihrs nicht die  
DurnKirche des Teuffels?

Zum dritten / Dabt ihr das Weihwasser  
vnd Saltz nicht allein in alle Kirchen / sondern  
auch in alle Winckel getrieben / als eine abwa-  
schung (oder Tauffe) der sünden / auch grosse  
Sauberey darin gelehrt / Wie Distinct. 3. Aquam  
sale, beweiset. Wer hats euch befohlen? Wo ste-  
hets geschrieben? Wo findet ihrs in der alten  
Kirchen / oder einsetzung der Aposteln? Wer ist  
hie die newe abtrünnige Kirche?

Zum vierden / Dabt ir Walfarten gestiff-  
tet / zu verdienen Ablas oder vergebung der sün-  
den / Welchs / weil es on Schlüsselampt geschie-  
het / durch eigen verdienst / ist auch ein newe an-  
dere Tauffe / oder abwaschung der sünden. Wer  
hats euch befohlen? Wo stehets geschrieben?  
Wo findet irs in der alten Kirchen / das ir sol-  
che newe vergebung oder Tauffe sollet stifften?  
Wer ist hie die newe abtrünnige Kirche?

Zum fünfften / Dabt ir Brüderschaften  
gestiftet / on zal / so viel / das ir auch alle Welt  
voll Siegel vnd Brieffe gemacht / alles zu Ab-

C iij lass

lass vnd Vergebung der Sünden / vnd zu ver-  
dienst / welchs allein der heiligen Tauff vnd  
Sacrament Ampt ist. Wer hats euch befoh-  
len? Wo stehets geschrieben? Wo findet irs in  
der alten Kirchen / das ir solche neue Verge-  
bung oder Verdienst stifften möget.

Vnd wer kans erzielen / wie mancherley  
neue weise ir auffs neue ertichtet / die Sünde  
zu vergeben vmb Gelt / oder vmb eigen Ver-  
dienst? Wer ist hie die neue Kirche / mit neuen  
Lehren vnd Sacramenten / daruon weder Chri-  
stus / Apostel / Schrift / noch alte Kirche ich-  
tes gewust haben.

Zum sechsten / Wer wil erzielen alle die  
grewlichen Newerung / die ir erdichtet habt / in  
dem Nochwirdigen Heiligen Sacrament des  
Leibs vnd Bluts Jesu Christi? Wer hat es  
euch befohlen? Wo stehets geschrieben? Wo  
findet irs in der alten Kirchen? das ir erstlich dis  
Sacrament der gantzen Kirchen nemen vnd  
rauben möget / vnd allein die eine gestalt lassen /  
vnd das gantze allein den Priestern zueige-  
hen?

Zum andern / darzu auch dieselbige einige  
gestalt / nicht den Glauben zu lehren vnd meh-  
ren / sondern in ein werck des gehorsams der  
Kirchen zu verkeren.

Zum dritten / das gantze Sacrament (wo  
es an

es anders als denn ein Sacrament ist) nicht  
zum gedechtnis Christi / von ihm öffentlich zu  
predigen / vnd jm für sein Leiden zu dancken /  
Sondern zu einem Pfaffenopffer / vnd eigen  
Verdienst eines bösen Buben / den andern zu  
verkauffen / vnd ins Fegfeuer den Seelen mit  
zuteilen / vnd für alle zeitliche not / wie einen  
Heidnischen Götzendienst / ja wie einen schend  
lichen Bremelpmarckt / auff das aller grew  
lichst vnd lesterlichst verwandelt. Damit ihr  
Christus gedechtnis (darzu ers doch gestiftet)  
geschweiget vnd ausgetilget habt.

Vnd wenn jr sonst so ein reine Kirche we  
ret / als der Apostel selbs / vnd noch viel reiner /  
so macht euch doch dis einige / grewliche /  
schreckliche stücke / welches jr aus des Teuffels  
Ahat / auff s newe erdichtet habt / zur newen /  
abtrünnigen / ketzerischen Kirchen / Ja zur  
Ertzhuren des Teuffels / vnd zur Dellschen  
Schulen.

Denn es ist dis stück so verzweiffelt / grund  
los böse / das es in diesem Leben keine Zung  
ausreden / kein Hertz begreifen kan / bis das  
der Jüngste tag erscheine.

Leset / samlet / klaubet alle das böse zusa  
men / so der Teuffel mit euch allen wider vns er  
richten kan / vnd lieget tausentmal so viel darzu /  
dennoch wirds nicht ein kleines Splitterlein  
werden /

werden / gegen diesem Balcken / daran nicht ei-  
ner / sondern one zweiffel alle Teuffel / vnd alle  
ergsten Buben / in sechshundert Jahren gezim-  
mert haben. Das ist der rechten stück eins / das  
Christus einen Grewel heisset in heiliger sted-  
te. Darumb nicht allein wir von euch sollen vnd  
müssen fliehen / als von dem grösten zorn Got-  
tes / sondern Himel vnd Erden entsetzt / vnd  
schewet sich für solcher Mordgruben / denn dis  
stücke leffet nicht allein kein Kirche bleiben / son-  
dern machet das ergeste Stancckgemach des  
Teuffels daraus / das auff Erden ist.

Der Türcke / Tattern / Jüden / sind weit  
nirgend so ein böse Mordgruben / als die Bep-  
stische Kirche / in diesem stücke. Denn sie ver-  
leugnen allein Christum / vnd keren den Rücken  
gegen jm. Aber diese nemen in hierin für sich /  
verspeien / verspotten / lestern / besudeln vnd mar-  
tern in / vnd spielen ein viel grewlichere Passion  
mit jm / weder jm leiblich von den Jüden ge-  
schach.

Ja gehet nu hin / vnd rhümet euch die hei-  
lige Kirche / von deren wir gefallen sind. Der  
Teuffel bleibe bey euch in solcher Kirchen / vnd  
alle die / so es mit euch halten. Gott behüte vns  
darfür / wie er vns denn gnediglich heraus ge-  
rissen hat / dafür jm lob vnd danck sey / in ewig-  
keit / Amen.

Zum



Zum siebenden / Wer hat euch befohlen /  
diese Newigkeit zu machen? das jr neue schlüs-  
sel / Ja zween falsche Dieterich geschmiedet ha-  
bet / damit jr nicht sünde vergebet noch behal-  
tet / wie die alten Schlüssel thun / bey vns / vnd  
in der gantzen alten Kirchen / Sondern stiftet  
auffs new sünde vnd mordt / da sonst keine sind /  
in ewrer newen abtrünnigen / mörderischē Kir-  
chen / Damit / das jr mit vntreglichen / vnzelich-  
en Gesetzen / die Christlichen Gewissen fahet  
vnd bindet / schrecket vnd tödtet / in Essen / trin-  
cken / Kleidern / stedten / tagen / vnd dergleichen  
eusserlichen dingen / die Christus frey geboten /  
Coloss. 2. vnd die alte Kirche also gehalten / on  
alle sünde vnd gefahr / Darzu Könige vnd Für-  
sten absetzet / als weret jr Gott selbs.

Wer ist hie abtrünnig vnd neue Kirche?  
Der Teuffel bleibe in diesem Gottslesterlichem  
Mörderischem / sündlichem / verderblichem stü-  
cke bey euch / der bleibt auch bey euch. Wir sind  
wider zur alten Kirchen kommen / Gott sey lob  
vnd danck.

Zum achten / Wer hat euch befohlen / vber  
der alten Kirchen weise / vnd wider Christus be-  
felch / anders zu predigen / den er befohlen hat?  
Matthei am 28. Cap. Gehet hin vnd lehret sie  
halten / was ich euch befohlen habe / Spricht  
nicht / Was euch recht vñ gut düncket. Joh. 14.

D

Der

Der heilige Geist wird euch alles lehren / vnd  
erinnern / was ich euch gesagt habe.

Ir aber habt alle Kirchen vnd Schulen so  
voll ewers Dreckes / das ist / Menschenlehre vnd  
Lügen / geschmissen / vnd ewres Beckens so voll  
gespeiet / das ( wie Jesaias sagt ) kein rhaum  
mehr da ist / vnd wöllet noch die Kirche gerhüt  
met sein.

Vnd dis stück ist neben der Winckelmesse /  
auch der ergsten Grewel einer / des schaden vnd  
Plage nicht auszugründen / noch zu zelen ist / da  
mit jr eine newe Kirche dem Teuffel gebawet /  
vnd demselben damit gedienet / das es ist eitel  
Seelmörderey worden / vnd der rechte Kinder  
fresser Molech / der nicht die Seelen ( wie jener  
Molech ) der Kinder selig werden leßt / ob sie  
leiblich verbrand wurden / Sondern wider  
umb den Leib eine kleine zeit lebendig leßt / vnd  
die Seele verbrent ewiglich. Ich kan für schre  
cken nicht viel an den Jamer der vnzelichen / fal  
schen / Abgöttischen / Mörderischen Lehren im  
Bapstumb / das ist / in ewer newen / schönen  
Kirchen gedenccken.

Vmneunden / Wer hat euch befohlen /  
diese freuentliche Newerung zu machen in der  
Kirchen / die ein Geistlich Reich ist / das ihr ein  
leiblich Heupt setzet / vnd nennet es den Aller  
heiligsten? So doch kein ander Haupt sein kan /  
denn

denn ein Geistliches/welches ist Christus? Dis  
ist der dritte ergeste Brewel in ewer Allerheis  
ligsten / ja Allerhellischen newen Kirchen.  
Denn die alte Kirche weis nichts dauon/ist bey  
irem Haupt blieben/ gleich wie wir.

Das es aber des Teuffels eigen Geschefft  
ist/ vnd kommen solte vmb der sünden willen/  
das weis sie / vnd hats verkündiget der heilige  
Geist Klerlich / 2. Thessal. 2. Der Mensch der  
Sünden / vnd Kind des verderbens / wird sich  
setzen in den Tempel Gottes / vnd sich stellen/  
als sey er Gott. Denn er leßt sich auch von euch  
nennen / irdischen Gott / So hat auch Daniel  
gesagt/ Er würde die alte Kirch/ vnd den Gott  
seiner Väter verachten/ vnd einen andern newen  
Gott/ vnd neue Kirche ( die jm seinen newen  
Gott wird helfen stercken) stifften.

Wer hat nu eine neue abtrünnige Kirche?  
Habens die alten/vñ wir/ so bey dem alten rech  
ten Haupt blieben sind/vñ den newen Teuffels  
Kopff fliehen vnd meiden? Oder sinds die/so den  
newen Teuffelskopff anbeten/ die Füße küssen/  
von seinen zweien Fingern sich segnen lassen/ sei  
ne Lehre vber das wort Gottes heben/ vnd das  
alte rechte Haupt/ nicht mit einem Kniebeugen  
ehren/ auch wol nimer an in gedenccken/vñ seins  
Segens / den er mit seinem gantzen Leibe vnd  
Blut vns erworben/nicht achten.

D ij

Aber

Aber dieser Grewel ist zu gewlich / das we  
nig dauon reden nichts hilfft / vnd doch recht  
dauon reden / keiner Engel zunge gnug ist. Was  
Gottes eigen Mund Grewel nennet / das mus  
ein grösser Grewel sein / denn alle Zungen reden  
können.

Zum zehenden / Wer hat euch befohlen /  
die newe Abgötterey auffzurichten ? das jr Wei  
ligen dienst stiftet / Heiligen Canonisirt / Fa  
steltage vnd Feirtage setzt / sie zu ehren / gleich  
als weren sie Gott selbs / das man auff jr Ver  
dienst sich verlesset vnd vertröstet / mehr denn  
auff Christum selbs / vnd auff alle sein Blut vnd  
Verdienst / Welchen jr zum Richter vns fürge  
bildet habt / den wir durch seine Mutter / vnd al  
ler Heiligen Verdienst vnd fürbitten / sampt vi  
seren Heiligen dienst versünen / vnd grade er  
werben müssen.

Das ewer Kirche in diesem stück nichts  
anders ist worden / denn der Heiden kirchen /  
die Iouem, Iunonem, Venerem, Dianam, vnd ande  
re verstorbene Menschen anbeteten / vnd wie die  
Römer ein Pantheon in irer Stadt Rom / Also  
habt jr auch ein Pantheon in der Kirchen ge  
bawet / das ist / aller Teuffel Kirchen.

Das werdet jr nicht finden in der Apostel  
Schrift / noch in der jungen Kirchen hernach /  
die vor zeiten auch der Heiligen Bilder nicht  
leiden

leiden wolt / vnd viel Bluts darüber vergossen  
ist / Schweige / das sie solten die Heiligen anbe-  
ten oder anruffen / das allein Gott gebüret.

Zum eilfften / Wer hat euch befohlen die  
Newrung zu machen / das jr den Ehestand ver-  
dampt / lestert / vnd verurtheilet in vnrein / vnd vn-  
tüchtig zum Gottesdienst. Dabt jr das von den  
Aposteln / oder von der ersten Kirchen? Ja frei-  
lich / denn S. Paulus sagt / 1. Timoth. 4. Das jr  
künfftig kommen würden / die sich vom Glau-  
ben vnd alten Kirchen abtrennen vnd verlauf-  
fen würden / als eine rechte Teuffelshure / die  
würde vom Teuffel solche Lehr empfahen vnd  
predigen wider den Ehestand / vnd doch selbst  
in falscher Deuchelkenschheit / das ist / in allerley  
Unzucht leben.

Diese Newrung sehen wir mit jren edlen  
Früchten / das euch die Erden nicht lenger tra-  
gen wil / vnd Gott mit seinem Gericht angefan-  
gen / drein zu greiffen / vnd solche neue heilige  
Kirche zu weihen / zum Dellischen Feuer hin-  
ein / Vnd wird sich nicht abwenden lassen / das  
wissen wir / Gott lob.

Zum zwölfften / Wer hat euch befohlen  
solche Newrung zu machen? das ihr mit dem  
weltlichen Schwerdt regieret vnd krieget / vnd  
das am meisten braucht / vnschuldig Blut zu  
vergiessen / Dabt jrs gesehen / jr scharffsichtigen

D iij

Fled

Fledermause/ das die Apostel oder alte Kirche  
mit Schwert die Welt bezwungen / oder mit  
Krieg die Kirchen gemehret haben? Wo kompt  
jr denn her/ die jr euch rühmet / Erben aus der  
alten Kirchen / vnd vns die neue abtrünnige  
Kirchen scheltet / die wirs mit der alten Kir-  
chen halten / vnd aus derselben herkommen/  
Jr aber aus der verlauffenen Teuffelshuren/  
ewer neuen Mörderischen Lügenkirchen her  
kompt.

Es sind noch viel mehr der neuen stücke/  
als Fegfeuer / Heiligthumb / Kirchenweihen /  
vnd des geschwürmes gantze Dreckel / vnd  
Drecketal / vnd sonst vnzeliche Bücher voll/  
von eitel neuen Fündlein / da die alte Kirche  
nichts von gewußt / noch die Apostel. Denn wer  
kan die Menge dieses Sands / oder Dreckes/  
ja Giff vnd Teuffels Lügen alle erzelen?

An diesen sey es dismal gnug zu beweisen/  
Wie schendlich die Papisten liegen / wenn sie  
vns die Neue abtrünnige / Ketzerische Kirche  
schelten / Sondern solch jr verliebt Schwerdt  
durch jr selbs hertz gehet / vnd sich erfindet/  
das sie die alte Kirche / vnd iren alten Breutig-  
gam / als ein Ertzteuffels Dure verlassen / ab-  
trünnig worden / vnd nicht allein Ketzerische  
(denn das Wort ist zu geringe vnd zu ehrlich  
solcher schandbübin) Sondern die Widerchris-  
tische/

stische/vnd Gottes widerige / Ja die sich vber  
Gott erhebt ( wie jr Breutgam im Dimel auch  
thun wolt) des Teuffels letzte vnd schendtlichste  
Braut ist.

Wir aber / weil wir alle solche Teuffeley  
vnd Newerey meiden vnd fliehen / vns wider zu  
der alten Kirchen / der Jungfrawen vnd reinen  
Braut Christi halten / sind wir gewislich / die  
rechte alte Kirche / on alle Durerey vnd New-  
rung / die bis auff vns daher blieben / vnd wir  
aus derselben kommen / ja widerumb auff  
new / von jr geboren sind / wie die Galater von  
S. Paulo. Denn wir sind weiland auch der Del-  
lischen Duren / des Papsts neuen Kirchen im  
Hindern gesteckt / mit gantzem ernst / das vns  
leid ist / so viel zeit vnd mühe inn dem Loche  
schendlich zubracht. Aber Gott sey lob vnd  
danc / der vns von der roten Lestehuren erlö-  
set hat.

Wenn doch solche Newerey im Papstum  
schlechte Newerey were / oder sein köndte / so  
waren sie noch etlicher masse / vmb friedes wil-  
len zu leiden / gleich wie einer seinen newē Rock  
treat oder leidet. Aber nu klebt diese Teuffliche  
Gifft / vnd Dellischer Mord daran / das es ge-  
bot der Kirchen / Heiliger Gottesdienst / gut le-  
ben / geistlich Wesen / heissen mus / darin man  
Gnade vnd Leben ( so man es hellt ) Oder  
30111

zorn oder todt ( so mans nicht helt ) verdienet.  
Das heisst aus Lügen Wahrheit / aus Teuffel  
Gott / aus Delle Himel machen / vnd wider  
umb.

Darumb ist des Papsts Kirche voller Lügen/  
Teuffel/Abgötterey/ Delle / Mordt / vnd  
alles Unglück/das es wimmelt. Vnd ist hie zeit  
zu hören die stimme des Engels/Apoca.18. Ge-  
het heraus von Babylon / mein Volck / das jr  
nicht teilhafftig werdet irer sünden/das jr nicht  
empfahet etwas von iren plagen/ denn ire sün-  
den reichen bis in den Himel/ zc.

Vor zeiten/da die Maler das Jüngste Ge-  
richt maleten / Bildeten sie die Dellen / einen  
grossen Trachenkopff / mit sehr weitem Rachen  
en / Darinnen mitten in der Blut stunden/der  
Papst/Cardinel/Bischoffe/Pfaffen/Münch/  
Keiser / Könige / Fürsten / allerley Man vnd  
vnd Weiber/doch kein jung kind. Ich wüste für  
war nicht/wie mā solte oder könnte des Papsts  
Kirchen feiner/kürtzer/ vnd deutlicher mahlen  
oder beschreiben. Denn gewis ist sie der Dellen  
schlund/der zu forderst den Papst selbs/ vnd al-  
le Welt verschlinget in Abgrund der Dellen/  
durch des Teuffels Rachen / das ist / durch ihr  
Teufflisch predigen vnd lehren.

Es mus nicht ein alber Mensch erdichtet  
haben/vielleicht aus Jesa.5.da er spricht. Die  
Delle



Welle hat ire Seele weit auffgesperret / vnd den  
Kachen on alle mass auffgethan / das hinunder  
faren beide ire Derrlichen vnd Pöbel / beide ire  
Reichen vnd Frölichen. Ist es aber Plumps  
oder schertzens also gerhaten / so ist es ein sehr  
wol gerhaten Bilde / dem einfeltigen Man die  
Pepstliche Kirche fürzustellen / dafür sich zu  
hüten / vnd dafür zu fliehen / die alles verschlun  
gen hat / one die jungen getaufften Kinder / dar  
von hernach weiter.

Die werden vnd mögen sie sagen / War  
umb schiltest du vns also schendlich / als newe  
abtrünnige Kirchen / so wir doch auch die Tauf  
fe / Sacrament / Schlüssel / Symbolum vnd E  
uangelium haben / so wol als die alte Kirche /  
von deren wir herkommen sind / Vnd du selbs  
droben bekand hast / das wir so wol als jr / aus  
der alten Kirchen herkommen?

Antworte ich / Es ist war / ich bekenne / das  
die Kirche darinne jr sitzt / von der alten Kir  
chen herkommet / so wol als wir / vnd eben die  
selbige Tauffe hat / auch die Sacrament / schlüs  
sel / vnd Text der Biblien / vñ das Euangelium.  
Wil euch noch höher loben / vnd bekennen / das  
wir aus der Kirchen vnter euch ( nicht von  
euch ) alles empfangen haben. Was wolt ihr  
mehr / sind wir nicht from genug? Wolt jr vns  
nu nicht forthin vngeketzert lassen? Wir wissen /  
E euch

euch für keine Türcken noch Jüden zu halten/  
( wie droben gesagt ) die auffer der Kirchen  
sind.

Sondern wir sagen / Ir bleibt nicht dar/  
bey / vnd werdet die verlauffene / abtrünnige/  
hürische Kirche ( wie es die Propheten pflegen  
zu nennen ) die nicht bleibet in der Kirchen / dar/  
aus sie geboren vnd gezogen ist. Laufft aus der  
selben Kirchen / vnd von dem rechten Man oder  
Breutigam ( wie Hosea sagt zu dem Volck Is  
rael ) zum Teuffel / Baal / Molech / Astaroth.  
Verstehet ihr das nicht ? Ich wil es euch sa/  
gen.

Ihr werdet alle gewislich getaufft / in der  
rechten Tauffe der alten Kirchen / wie wir /  
sonderlich in der Kindtheit. Vnd was also ge/  
taufft / lebt vnd stirbt / bis in das siebend oder  
achte Jar / ehe denn es die Durenkirche des  
Papsts verstehet / ist gewislich selig worden /  
vnd wird selig / daran zweiffeln wir nicht. Aber  
wenn es gros wird / vnd ewer Lügenpredige /  
von ewerer Teuffelischen Newerey höret /  
glaubt vnd folget / so wirds zur Teuffelshuren  
mit euch / vnd fellet ab / von seiner Tauffe vnd  
Breutigam ( wie mir mit anderen geschehen )  
hawet vnd trawet auff seine Werck / wie jr Du/  
rentreiber in ewren Durenheusern / vnd Teuf/  
felskirchen predigt / So es doch getaufft ist /  
zu traw

zu trawen vnd zu barwen / auff seinen Einigen  
lieben Breutgam / vnd **HERN** **Jhesum**  
**CHRISTum** / der sich selbs für vns gege-  
ben hat.

Vnd gehet gleich / als wenn ein frommer  
Gesell / ein armes Junges / Bettelisch / Leibeis-  
gen Meidlin auffzöge / zur künfftigen Braut /  
vnd sich mit jr verlobete / vnd sie sich fein keusch  
hielte / bis sie Manbar würde / Als denn verke-  
rete sie die Augen / sehe andere Gesellen an / die  
jr bass gefielen / lies sich bereden / würde brün-  
stig auff dieselbigen / verliesse jren Dertzlieben /  
trawen Breutgam / der sie erlöset / ernehret / er-  
zogen / gekleidet / geschmücket / vnd schön gehal-  
ten / vnd liesse sich von jederman zur Duren  
machen.

Diese Dure / so zuuor ein reine Jungfraw  
vnd liebe Braut war / ist ein abtrünnige / verlauf-  
fene Ehebure / ein Hausbure / ein Bettbure /  
eine Schlüsselbure / die im Hause fraw ist /  
Schlüssel / Bette / Küchen / Keller / vnd alles  
in jrem befelch hat / so böse / dargegen die ge-  
meinen freyen Duren / Puschburen / Feldhu-  
ren / Landburen / Meerburen / schier Weilig  
sind / Denn diese ist die rechte Ertzbure / vnd ei-  
gentlich ein Teuffelshure.

Von solcher Duren saget **Mosea** / vnd gar  
viel gröblicher / vnd schier zu gröblich / der Pro-  
phet

**E ij**

**phet**

phet Ezech. Cap. 23. das möget jr lesen / so jr wis  
sen wolt / was für eine Dure ewre Kirche ist.  
Denn eine solche Dure / meine ich / wenn ich  
euch eine abtrünnige / verlauffene Dure schelte /  
die jr in der Kindheit rechte Christen getaufft /  
auff den lieben NEREN / etliche Jar gelebt /  
wie die alte Kirche. Darnach wenn jr gros wor  
den / vnd zur Vernunft kommen seid ( wie ich  
selbst mit allen andern auch gethan ) sehet vnd  
höret jr die schönen Ceremonien / der Pöpstli  
chen Kirchen / dazu den genies / Ehre / vnd ge  
walt / die drinnen gleissen / Ja die prechtige Wei  
ligkeit / vnd grossen Gottesdienst / vnd fürge  
plauderts Himelreich / vergesset jr ewres Christ  
lichen Glaubens / Tauffe vnd Sacrament / wer  
det der Lena / der Ertzhuren fleissige Schüles  
rin / vnd junge Dürin ( wie die Comedien sa  
gen ) bis jr alte Duren / widerumb junge Dür  
lin machet / vnd so fort an des Pöpsts / ja des  
Teuffels Kirchen mehret / vnd viel von den rech  
ten Jungfrewlin Christi / so aus der Tauffe ge  
boren / jmer fort auch zu Ertzhuren machet.

Solches halt ich sey Deutsch geredt / das  
jr vnd jederman verstehen kan / was wir mei  
nen. Denn ob jr solche Newerey bey euch für  
schertz haltet / die jr keinen Gott habt noch ach  
tet / so ist doch für Gott schrecklich / gewlich /  
Abgötterey / Mord / Melle / vnd alles Unglück /  
das

das er nicht leiden kan / das er darumb die Ertzhure ewiglich verdammen will.

Quonon weissaget auch S. Petrus / da er von euch solchen newen Propheten vnd Kirchen redet / 2. Pet. 2. Sie reden prechtige Wort / da nichts hinder ist / vnd reitzen durch vnzüchtiges leben / zur weltlichen Lust / die jenigen / so recht entrunnen waren / vnd nun in Irthumb wandlen müssen / Verheissen ihnen Freyheit / Vergebung vnd Abblas / so sie selbs knechte der Verdammnis sind.

Item / sie waren dem Vnflat der Welt entflohen / durch die erkentnis des HERRN vnd Weilandts Ihesu Christi / vnd werden widerumb in dieselbigen geflochten vnd vberwunden / Wird also das letzte erger mit inen / denn das erste war. Es were inen besser / das sie den Weg der Gerechtigkeit nicht erkennet hetten / denn das sie in erkennet haben / vnd sich widerumb keren / von dem heiligen Gebot / das inen gegeben ist. Es ist inen widerfahren / das warhaftige Sprichwort / Der Hund hat ausgespeiet / vnd frisst es widerumb / Die Sawe ist in der schwemme gewaschen / vnd weltzet sich wider in dem Koht. Das seid jr / so bin ich auch gewesen.

Da habt jr ewre newe / abtrünnige / verlauffene Kirchen / Deutsch gnug beschrieben /

L iij

vnd

vnd klar genug für die augen gemahlet. Denn wir bekennen nicht allein / das jr mit vns aus der rechten Kirchen kommen seid / vnd mit vns in der Tauffe geschwemmet vnd gewaschen / durch das Blut vnseres D<sup>E</sup>rrn vnd Heilands Ihesu Christi / wie S. Petrus hie sagt / Sondern sagen / das jr auch in der Kirchen seid vnd bleibt / Ja wol / das jr darinnen sitzet vnd regieret / Wie S. Paulus weissaget / das der verfluchte Antichrist im Tempel Gottes (nicht im Kuhstall) sitzen wird / &c.

Aber von der Kirchen / oder Glieder der Kirchen seid jr nicht mehr / sondern in solcher heiligen Kirchen Gottes / richtet jr auff solch ewer newen / abtrünnigen Kirchen / Teuffels Durhaus / vnd vnzeliche Durerey vnd Abgötterey oder Newerey / dardurch jr die getaufften vnd erlöseten Seelen mit euch verführet / vnd durch den Döllischen Rachen / in Abgrund der Hellen verschlinget / mit vnzelichem Hauffen / mit schrecklichem Jamer vnd Hertzelenleid / aller deren / so solches mit geistlichen Augen sehen vnd erkennen.

Gott aber ist / der durch seine wunderbarliche / allmechtige Macht bey euch / vnder so viel Greweln vnd Teuffels Durerey / dennoch die jungen Kinder / durch die Tauffe erhelt / vnd etliche Alte / aber gar wenig / die an irem Ende  
wider /

widerumb zu Christo sich gehalten haben / deren ich denn viel selbs gekandt habe / das doch die rechte alte Kirche / mit irer Tauffe vnd Gottes Wort / vnter euch bleibet. Vnd ewer Gott der Teuffel / durch so viel newer Abgötterey / mit aller ewerer Teufflischen Durerey / sie nicht hat können gantz vnd gar vertilgen.

Gleich wie er zur zeit Elie / da alles (wiewol es alles Gottes Volck / das ist / die Heilige Kirche hies / vnd den Gott / der sie aus Egypten geführt hat / rhümeten) voll vnd eitel Saal / Abgötterey vnd Durerey / im gantzen Lande war / das Gott nicht einen Altar behalten hette / den noch sieben tausent Man vbrig blieben / von allen denen vielen Tausenten / da die grössesten vnd besten vnter waren / vnd zum Teuffel führen / Vnd in der Wüsten vnter Mose alle starben / on diese zween / Josua vnd Calch.

Gottes Werck heisset / Consummans & abbreuians, das er etliche wenig aus Gnaden erhelt / Wenn der gantze Hauffe im zorn vntergehet / darvon S. Paulus Roma. 9. reichlich redet.

Also hat auch Daniel 12. lange zuuor ge-  
weissaget / das vnter dem Antichrist solt eine  
zeit des Zorns sein / vnd solche Trübsal / als nie  
gewest ist auff Erden. Vnd S. Paulus 2. Thess.  
2. der seine Weissagung aus Daniel daselbst  
nimpt /

nimpt / spricht auch / Gott werde zürnen / vnd  
kressftige Irthumb lassen kommen / darumb/  
das man die Wahrheit mit Liebe nicht angeno-  
men hat zu der Seligkeit.

Lieber lass vns vnser / das ist / der Christen  
heit Historien ansehen. Vnder Constantio dem  
Son Constantini / war der zorn Gottes so  
gros / das die Ketzer Ariani alle Kirchen in der  
Welt inne hatten / bis auff zwo / Vnd waren  
doch dazumal die Bischoffe / auch die Arianer  
selbst / gelehrte / frome / Erbare / fleissige Leute  
für der Welt. Was solt denn sein vnder dem  
Papstumb / da kein Bischoff sein Ampt kan  
noch vbet / Epicurisch vnd Sewisch leben / da  
mus es doch gar der Teuffel sein.

Darumb die elenden / blinden / verstockten  
Papstesel / viel weniger verstehen / was Kirche  
oder Gott sey / weder eine Kbu oder Saw ver-  
stehet / Es ist ein hoch / tieff / verborgen ding die  
Kirche / das sie niemandt kennen noch sehen  
mag / Sondern allein an der Tauffe / Sacra-  
ment vnd Wort / fassen vnd gleuben mus. Men-  
schen Lehre / Ceremonien / Platten / lange Kö-  
cke / Bischoffshüt / vnd das gantze Bepstlich ge-  
prenge / füret nur weit daruon in die Welle hin-  
ein / schweige / das es die Kirchen anzeigen solt.  
Denn zu der Kirchen gehören auch nackende  
Kinder / Man / Weib / Bawr / Bürger / die doch  
weder



weder Platten / Bischoffshüt / noch Wesege-  
wandt anhaben.

Also haben wir nu mit Luthero Deutsch /  
vnd starck gnug beweist / das wir dennoch die  
rechte / warhafftige / Christliche Kirche sein /  
vnd das vns von jnen gewalt vnd vnrecht ge-  
schicht / das sie vns Ketzzer schelten / vnd die  
newe / abtrünnige / verfürische Kirche nennen.  
Vnd ist jnen solches zuuor mehr denn einmal /  
für die Nasen gelegt worden / das sies haben  
mit jren Augen gesehen vnd gelesen / Aber weil  
sie so fein können vberhin hüpfen / das Maul  
wischen / vnd sich stellen / als hetten sies nie ge-  
sehen noch gehört / so mus mans jnen bis zum  
eckel / immerdar auffs new einferwen vnd ein-  
blewen / ob sie es ja nicht wolten lesen / das sies  
doch müsten greiffen / vns zum Trost / dem Ein-  
feltigen zum Vnterricht / vnd zu einem Zeugnis  
vber sie / das sie sich nicht zu entschuldigen ha-  
ben an jenem Tage.

Vñ weil sie den zuuor dis Nüsslin nit haben  
beissen könnē / so sind wir guter hoffnüg / sie wer-  
dēs vñ sollēs auch hinfurt lassē vngbissen bleibē.

Von dem das sie vns Donatistē schel-  
ten / vñ schuld gebē / dz wir on wichtige vrsachē /  
nur vñ etzlicher gebrechen vñ misbreuch willē /  
von jnen vñ der Römisch. Kirchē abgewichē sein.

§

Aus

**D**as gethanem bericht folget auch weiter/  
das sie vns mit vnwarheit Donatisten  
schelten / denn wie können wir Donatis-  
sten sein / weil wir in keinem stücke mit den Do-  
natisten halten / auch in keinem Artickel also le-  
ren / wie die Donatisten geleret haben :

Sie haben gelert also / Das Ministerium  
vnd Predigamt / Item / die Heiligen Hoch-  
würdigen Sacramenta / sein krefftig vnd vn-  
krefftig / nach dem die Diener / so das Amt fü-  
ren / vnd die Sacrament reichen / böß oder  
from sein.

DArgegen lehren vnd zeugen wir / vnd  
sagen aus grund der heiligen Schrift also / das  
Gottes Wort vnd die Sacrament / nicht erger  
noch besser werden / vmb der Person willen /  
sondern on vnterscheid der Person / sie werden  
gereicht von wem sie wollen / so behalten sie  
ire Krafft vnd Wirckung / wie sie dieselbige  
von **CHRISTO** / der sie hat geordnet vnd  
eingesetzt / haben empfangen vnd bekommen /  
Denn seine Wort vnd Verheissung werden  
nicht zur Lügen / vmb keines Menschen wil-  
len / sihe du nur zu / das du derselbigen im Glau-  
ben brauchst / vnd durch den Glauben dich  
derselbigen teilhaftig machst / so sollen sie le-  
ben vnd Seligkeit in dir warhafftiglich wir-  
cken /

cken / wie die Wort der Verheissunge lauten /  
Wie auch Sanct Paulus spricht / Rom. Cap. I.  
Das Euangelium ist eine Krafft Gottes zur  
Seligkeit / allen denen die dran glauben / es  
werde geprediget von wem es wolle / vnd der  
Prediger sey from oder böß / Denn es ist nicht  
Menschen / sondern Gottes Krafft / der seine  
Krafft wircken kan / one ver hinderung / so wol  
durch die Bösen / als durch die Frommen.  
Gleich wie ein köstlich Edelgestein / edel vnd  
köstlich bleibt / es werde versetzt in einen gül/  
den oder eyßern Ringk / das Gold macht den  
Stein nicht besser / so macht in auch das Eyssen  
nicht erger / sondern wie der Stein von art  
vnd natur edel vnd köstlich ist / also bleibet er  
auch in seinem werd / das ist / köstlich vnd edel /  
er werde gefast womit er wolle.

Item / Die Donatisten haben gelehret /  
Die Kirche in diesem Leben / müsse one allen  
taddel vnd Sünde sein / auch nach dem Flei/  
sche pur lauter / rein vnd heilig / etc. Darge/  
gen sagen vnd lehren wir / solchs sey nicht  
möglich / denn auch die allerheiligsten vnd  
besten Christen inn dieser Welt / one schwa/  
cheit vnd Sünde nicht sein können / weil sie  
im Fleische leben / drum b sie vmb vergebunge

S ij

der

der Sündenbitten / vnd dieselbige auch durch  
Ihesum Christum glauben vnd hoffen.

Wir wissen auch / das zu aller zeit viel Un-  
frauts vnter dem guten Weitzen ist / vnd viel bö-  
ser vnd falscher Christen / so nur allein den Na-  
men führen / mit den rechten warhafftigen / vnd  
frommen Christen vermischet vnd vermengt  
bleiben / Welche auch gar vnd gantz vonein-  
ander nicht können noch mögen gescheiden vnd  
gesondert werden / es sondere vnd scheide sie  
denn der Son Gottes selbst / wie geschehen  
wird am Jüngsten Tage / Als denn / wie die Pa-  
rabel lautet / Matth. 13. wird er seine Engel sen-  
den / vnd sie werden samlen aus seinem Reich  
alle Ergernis / vnd die da vnrecht thun / vnd  
werdē sie in den Fewrofen werffen / Mitler zeit  
bis zu solcher Erndte / mus man beides mitein-  
ander wachssen lassen / wie Christus spricht 2c.  
Item / als denn wird der Breutgam selbst kom-  
men / vnd die Beste besehen / vnd die / so kein  
Nöchzeitlich Kleid anhaben / vnd doch gleich-  
wol vnter den andern Hochzeit Besten geses-  
sen sein / Das ist / die Heuchler / so one Bussfer-  
tigkeit vnd Glauben / vnter den fromen Chris-  
ten vermischet dahin gangen sein / ausmustern /  
vnd in die eusserste Finsternis hinaus werffen.  
Vnd das Böse vnd Frome vntereinander sein  
werden / bis an Jüngsten Tag / bezeuget auch  
das

das Gleichnis vom Netze / Matth. am 13. Cap.

Item / vmb solcher fehl vnd gebrechen willen des eusserlichen Lebens / haben die Donatisten sonderung gemacht / vnd sich von der rechten Christlichen Kirchen ausgesichert / vnd eine neue eigene Kirche vnter sich selbst angerichtet / die da hat sollen on alle sünde vnd gebrechlichkeit sein vnd leben.

Wenn wir nu auch also gethan / etzlicher geringen gebrechen vnd fehl / oder Misbreuch / wie es der Bischoff nent / oder etzlicher irer bösen Buben vnd Unkrauts halben / vns von inen vnd der Römischen Kirchen gescheiden vnd abgesondert hetten / so weren wir stresslich vnd schuldig / vnd möchte man vns billich Donatisten schelten.

Aber nu wissen sies viel anders / Nemlich / das es gar nicht zu thun gewesen ist / vmb etliche fehl vnd gebrechen des Lebens / oder etzliche Misbreuche / sondern ist zuthun gewesen vmb die grossen / vielfeltigen / erschrecklichen Greweln / damit das Papstumb vnd die Römische Kirche zu grund aus ist verderbet vnd vergiftet gewesen / beide an Lehr vnd an Leben / welcher man sich nicht lenger hat teilhafftig machen sollen noch können / nach dem sie Gott hatte selbst offenbart / vmb seines ernstest Gebots willen / denn es heisst also / Du solt nicht andere Götter haben.

ben. Du solt den Namen deines Gottes nicht  
lestern / Du solt den Feiertag heiligen. Vnd  
Sanct Paulus spricht / Fliehet Abgötterey /  
Item / Wird jemandts ein ander Euange-  
lium predigen / der sey verflucht. Vnd vom öf-  
fentlichen vnbusfertigen Leben spricht Sanct  
Paulus also / So jemandt ist / der sich leßt ei-  
nen Bruder nennen / vnd ist ein Durer / oder  
ein Geitziger / oder ein Abgöttischer / oder  
ein Lesterey / oder ein Trunckenboldt / oder  
ein Reuber / mit demselbigen solt jr auch nicht  
essen / etc.

Ob wir nun wol vmb solcher Göttlichen  
gebot willen / sie flugs zu verlassen vnd zu ver-  
dammen / gut macht vnd recht gehabt / so has-  
ben wir doch das beste eine lange zeit bey  
vns lassen bestehen vnd bleiben / vnd sein im  
anfang / nach Christlicher Liebe / mit gros-  
ser bescheidenheit mit ihnen vmbgangen / sie  
auch trawen nicht flugs für den Kopff gestos-  
sen / noch plötzliche alles vber einen Hauffen  
geworffen / wie man vns hierinnen auch mit vn-  
warheit schuld gibt / sondern alle Christ-  
liche Mittel auff's demütigste vnd glimpff-  
lichste gesucht / ob sie hetten können be-  
kert vnd gewonnen werden / das sie weren in sich selbst  
gangen / hetten jr Gottlos wesen erkandt / vnd  
gebüßt / vnd sich selbst reformirt vnd gebessert.  
Denn

Denn wie gelinde vnd demütig / auch mit  
furcht vnd zittern / D. Martinus Luther / von  
Gott erweckt / diesen handel erstlich angefan-  
gen hat / ist inen vnuerborgen / vnd stehen seine  
Acten öffentlich da / welche solches bezeugen.  
Vnd ist derhalben wie gesagt / gar nichts / we-  
der geschwinde noch mit ernst / weder mit le-  
stern noch mit schenden (wie sie es nennen)  
auch nicht mit zorn vnd vngestüm / sondern al-  
les auff's demütigst vnd freundlichst fürgeno-  
men / Also / das man sehen kan / wer seine Acta  
weis oder list / wie es dem guten Man allein  
ymb die Warheit ist zu thun gewesen / als dem  
solcher Grewel / damals mit grosser frecheit  
vom Tetzeln gepredigt / von hertzen wehe that /  
vnd hette lieber einen bessern standt in der Kir-  
chen gesehen / vnd was seine meinung damals  
gar nicht / jemandts auff Erden / viel weniger  
den Papt / oder die Römische Kirche zu ver-  
kleinern / oder einzubrechen.

Dette nu solche Christliche demütige wol-  
meinung / vnd hertzliche trewe Warnung / der  
Römische Stuel zu danck erkand vnd angeno-  
men / vñ solchen vbermachtē freuel behertziget /  
sich gebessert / dauon abgestanden / vñ reformi-  
rē lassen / so were alles ins Wachs gedruckt / ver-  
gessen / verziehē / vñ nimmermehr gedacht wordē /  
nach der regel Christi / wie gesagt / So dein Bru-  
der

der sündiget / so straffe in / so er sich bessert / so  
vergib in / vnd wenn er siebenmal des tages sün-  
digen würde / vnd siebenmal des tages wider  
keme / vnd spreche / es rewet mich / so soltu in  
vergeben / Luce 17. Item / rücke dem seine sünde  
nicht auff / der sich bessert / Syrach 8.

Aber solche Christliche Warnung / kondt  
der Römische Stul nicht in güte vertragen / denn  
das stündlin seiner Offenbarung was komen /  
aus Gottes gerechtem Gericht / Darumb fieng  
er an / wie ein besessener Mensch / mit seinem gan-  
tzen Reich / zu sprühen / zustürmen / zuplixen vnd  
zu donnern / vnd was des wütens / mit bannen /  
würgen vnd morden / vnd anderer vielfeltigen  
Grausamkeit / kein mass noch ende / Denn der  
Bapst wolte nach seinem Decret vngestraft  
sein / wie denn darinnen klerlich stehet / Dist. 40.  
Si Papa, Das niemants macht habe den Bapst /  
ob er auch viel tausent Seelen in Abgrund der  
Hellen fürete / zu fragen / warumb thustu das?  
Viel weniger in deshalben zu straffen / oder zu  
verdammnen.

Nu kondte Luther seines grausamen to-  
bens vnd wütens halben nicht stillschweigen /  
noch die Wahrheit verlassen / sondern fuhr fort /  
was recht war zu verteidigen / aus dem gieng  
das Fewr auff / vnd hub an zu brennen / wie es  
noch (Gott lob) hentiges tages brennet.

Leidet



Leidet nu der Papst in solchem fewr schaden/vñ thut es jnen wehe/das sie so tieff sind gefallen / so wollen sie doch bedencken/ das sie zu solchem jrem verderb vnd schaden/selbst vrsach geben haben/als die da Gott nicht haben wollen gehorsam sein/noch der Wahrheit folgē/wie sie denn desgleichen noch nicht thun / bis auff den heutigen tag/sondern bleibē auff jrem thun vnd wesen verstockt/vnangesehen / ob es gleich nicht gefellt/ weder Gott noch den Menschen/vñ gedencken sich/in summa/ nicht vmb ein harbreit zu bessern / schützen vñ handhaben alle vn gerechtigkeit vnd Gottloss wesen/sein der wahrheit vñ dem Euangelio feind/verdammten vns/vnd lestern vnserē Lehr/vnd vben wie zuuor/also auch noch/on alles auffhörē/vielfeltige grausamkeit wider die fromen Christen / morden vñ erwürgen/od wo sie es am gnedigsten machen/treiben ins elend/vnd verjagen die armen Pfarherren/mit jren Weibvnd Kleinen Kindlin / aus keiner andern vrsach/on allein/das sie trewlich vnd fest bey der Wahrheit halten / vnd sich dem anfang jrer vnchristlichē verenderungen der Religion/damit sie schwanger gehen/nicht vnterwerffen können/wollen auch nit leidē/ das man jr vñ jrer Pfaffen vnordētlich vñ teuflisch wesen sol straffen/vñ hetten alle frome Prediger lengst veriagt od des tods sein müssen / wo es bey jnen allein were gestanden,

G

Weil

Weil sie denn so Teufflischer weise / hals-  
starrig / verblindt / vnd vnbusfertig / auff irem  
bösen sinn bisher geblieben vnd verharret sein /  
auch noch bleiben vnd verharren / vñ niemands  
folgen wollen / Auch alle ire Grewel vnd sünde  
nur mit newen ertichten farben / vnd triegen  
dem schein bementeln / geschweig das sie sie er-  
kennen / widerruffen / oder dauon abstehen sol-  
ten / oder einige reformation leiden / wie sie sich  
denn etwan zur zeit haben öffentlichen hören  
lassen / sie wolten nicht weichen / vnd solte gleich  
die Kirche zu boden gehen.

Was wil denn der Bischoff viel plaudern  
vnd waschen / wie er auch thut in seinem vori-  
gen Buch / man solte die Kirche reformieren /  
nicht einbrechen / denn reformieren vnd einbre-  
chen sey zweierley / Mein Herr Bischoff / das  
wissen wir selbst wol / Wir haben vor sieben Ja-  
ren gewust / das Nuffnagel eysen sein / Wie sol  
man aber euch reformiren vñ bessern / so jr euch  
nicht bessern noch reformiren lassen wolt? Des  
Teuffels spott ist / damit man noch die arme  
Kirche zu irem schaden hönet / Christus der  
Herr wird die Reformation von oben herab an-  
fahen müssen / durch seinen liebē Jüngsten tag /  
wie wir denn hoffen / sonst hab ich sorg / wird  
nichts draus werden.

So frag ich nu / Wer vns denn verdenccken  
kann?

Kan/das wir vns vō solchem verkerren hauffen/  
weil kein buss noch besserūg da zuhoffen/haben  
abgesondert/vnd keine gedult mit inen nit mehr  
tragen können/sondlich/weil wir solchs zu thū  
auch Gottes offenberlichen vñ klaren befehl ge  
habt? Denn spricht Christus / wenn du deinen  
Bruder gestrafft hast/zum ersten/andern/vnd  
dritten mal/in geheim vnd öffentlich/vñ hat de  
ren keins nit helfen wollen/Sit tibi sicut Ethnicus  
& publicanus, so halt in für einen Weiden/vñ Zöl  
ner. Matt. 18. Das ist/las in faren/vnd in Got  
tes Gericht bleiben/du aber habe kein gemein  
schafft mit im/Vñ S. Paul. Tit. 3. Einen ketzeri  
schen Menschē soltu meiden/wen er einmal vnd  
abermal vermant ist/vñ wisse/dz ein solcher ver  
kert ist/vñ sündiget / als einer der sich selbst ver  
urteilt hat. Vñ in der andn Joha. So jemād zu  
euch kompt/vñ bringet diese lehr nit/den nemet  
nicht zu hause/grüßet in auch nicht/den wer in  
grüßet (gemeinschaft mit ihm hat) der macht  
sich teilhaftig seiner bösen werck. Vñ Apoc. 18.  
Gehet aus vō ir/mein Volck/dz ir nit teilhaftig  
werdet irer sündē/auff dz ir nit empfahet etwas  
vō irer plagē/denn ire sünden reichen bis in den  
Himmel/vñ der Herr denckt an iren freuel. Item  
Matt. 8. Hütet euch für den falschen Prophetē.  
Itē/hütet euch für dē Saurteig d Phariseer ꝛc.

Also haben wir vns vō der Römischen Kir

G i f

chen/

chen / in Gottes namen / vnd auff seinen befelch /  
als von einem verlornen Volck / abgesondert /  
vnd damit nicht die alte rechte Kirche / vnd vnse  
re Mutter verlassen / sonder aus der verfluchten  
des Teuffels Kirchen gegangen / vñ widerumb  
in die Heilige / warhafftige / vñ allgemeine Kir  
che vnser Herrn Ihesu Christi getretten / von  
welcher sie / als die Gott treulos vnd meineidig  
worden / sind abgewichen / vñ sind also dennoch  
nit Donatisten / wie vns der Bischoff felschlich  
antichtet vñ schuld gibt / sondern haben hiemit  
gethan / aller ding / wie die Apostel thū mussten /  
als die alte Kirche (nach dem schein vnd im Ti  
tel) die neue / falsche vnd abtrünnige aber im  
grund vnd in der warheit (die Synagoga der Jü  
den) Christum vnd das Euangeliū nicht anne  
men wolten / wurden sie auff Gottes befelch / vñ  
dem Exempel Christi nach / wider sie zu hädeln  
vnd zu predigen / gedrungen / bis sie Gott endt  
lich gar vnd gantz zerstörete.

VND machten die lieben Apostel damit  
nicht eine falsche / neue / eigene Kirche / ob sie  
wol derhalben gelestert vnd verdampft werden  
mussten / sondern wandten vnd kerten sich dar  
durch widerum zur rechten / alten / vñ gemeinen  
Kirchen der Propheten vñ Patriarchen / Wel  
che nicht stehet in eusserlichen Caruen vnd Ges  
preng / Titel / schein vnd Namen / wie die Syna  
gog

gog vnd das Bapstumb heutigs tags / sondern  
im Geist / rechten Glauben / vnd reiner erkent-  
nis Gottes vnd der Wahrheit / vnd wird erkandt  
beim Euangelio / vnd rechten brauch der heiligi-  
gen hochwirdigen Sacramenten.

Vnd dient nichts hieher / das er bey diesem  
stück viel plaudert / wie das man die Kirche / so  
etzlicher Misbreuche halben vngestalt ist wor-  
den / drum nicht sol gar verwerffen / Sondern  
wie er ein gleichnis gibt im andern Buch / sie  
wie eine gebrechliche Mutter dulden vñ tragen.  
Den es ist mit der Bepstischen Kirchen gar viel  
vnd weit ein anders / denn da ist keine gebrech-  
lichkeit / wie jetzt gehöret / sondern eitel vnd lau-  
ter mutwill / So sind es auch nit schlechte men-  
gel oder fehl / am eusserlichen leben / vmb wel-  
ches willen wir sie straffen / damit wir köndten  
gedult haben / sondern grosse / gewliche / öffent-  
liche / vñ dazu (welches erst recht der Teufel ist)  
wie auch oben gesagt / vngelüste vñ mutwillige  
Sünde / beide in der Lehr vnd im Leben.

So ist es auch ein weit vnterschiedlich ding /  
schwachheit vnd gebrechen des eusserlichen Le-  
bens / oder sonst schlechte Irthumb an den Men-  
schen dulden / vnd öffentlich Gottlos wesen /  
samt falschen vnd vnrechten Gottesdiest bil-  
lichen vnd stercken / Jenes sol vñ kan die Christ-  
liche Liebe thun / das ander aber dargegen / kan

vnd sol der Christliche Glaube nicht thun / denn  
er kan vnd sol nicht / was Gott vnd seinem wort  
zuwider ist / sonderlich wo es / wie von den Pa-  
pisten / halsstarrig geschicht / mit gedult vñ still-  
schweigen billichen vnd stercken / sondern mus  
demselbigen widersprechen / vnd es richten vnd  
verdammnen / Denn das ist die natur des rech-  
ten Glaubens / das er nicht kan mit stillschwei-  
gen heuchlen vnd meuchlen / Sondern feret er  
aus auff öffentlichen Plan / vnd thut sein bekennt-  
nis für jederman / Gott seinem Herrn zu ehren /  
wie auch David sagt / Credidi, propter quod locu-  
tus sum, Ich gleub / darumb rede ich. Vnd S.  
Paulus Rom. 10. lehret / das ein gleubiges hertz  
durch den Mund heraus breche / vnd in seinem  
bekenntnis leuchte. Vnd allhie schonet der Glaub  
niemandts / ob gleich die Lieb oft schonet / den  
der Glaube ist niemandts verwandt / on allein  
seinem Gott / was nu demselbigen seinem Gott  
zuwider handelt / das strafft / verwirfft / vñ ver-  
dampt der Glaube / on allen vnterscheid der Per-  
son. Galat. 1. So jemandts / auch wir / oder ein  
Engel vom Himel / euch würde ein Euangeli-  
um predigen / anders / denn das wir euch gepre-  
digt haben / der sey verflucht.

Wenn es nu in dieser ordnung gehet / so ge-  
het es recht / vnd also mus es gehen / so es an-  
ders nit vnrecht gehē / Nemlich / weil die Kirch  
in die

in diesem Fleisch vñ Blut / nach dem eusserlichen  
leben schwach ist / so sol sie auch nach derselbi-  
gen des lebens schwachheit / geduldet vnd getra-  
gen / vnd jr verziehen vnd vergeben werden / vnd  
sol je bey leib deshalb kein Mensch von jr ein  
sönderung machen / wie die Donatisten theten /  
denn es wird doch nichts anders draus / Sün-  
de wird bleiben / weil die Kirche im Fleisch ist /  
Derhalben sol vnd mus auch Lieb vnd Barm-  
hertzigkeit bleiben / dardurch eines dem andern  
verzeihe vnd vergebe:

Aber im Glauben vnd in der Lehr / da mus  
sie nicht falsch / vnrecht / sündhafftig / oder brü-  
chig sein / sondern vnuerrückt / gesundt / rein /  
vnd lauter bleiben / Denn die Kirche / ob sie  
gleich des lebens halben sündiget / so sol vnd  
kan sie doch der Lehr vnd Glaubens halben nit  
sündigen / denn sie ist heilig / ein Pfeiler der War-  
heit / vnd kan nicht irren. Im fall aber / da etliche  
ire glieder im glauben vñ in der lehr sündhafftig  
würde / so müssen sie (die andern gesunden Glie-  
der) dennoch durch die Liebe vnd mit gedult nit  
darinnē sterckē / sondern durchs Wort vñ Euan-  
geliū straffen / vñ durch freundliche vñ Christli-  
che vermanungen auff den rechten weg weisen.

Wo sie aber als denn nicht folgen wolten /  
noch inen rathen lassen / sondern in irem irtumb  
halsstarrig bleibē / als den würde solche Ketzer /  
vnd we

vnd weren nicht mehr Glieder der Kirchen/son-  
dern hetten dieselbigen zu sein auffgehört / Die  
müſte man denn lassen gehen / vnd als verbante  
meiden/wie die Synagog der Jüden / Gottes  
Kirche nicht mehr sein konte / als sie die War-  
heit verlies / vnd Lügen verteidiget / vnd der  
Teuffel selbst / konte nicht mehr ein Engel sein/  
als er von der Wahrheit abwicke / vnd ein Lüg-  
ner wurde / Johan. 8.

Also hette man billich mit der Römischen  
Kirchen / bis zur besserung / gedult getragen/  
wenn es des lebens fehl vnd gebrechen / oder  
sonst vnwissentliche Irthumb gewesen weren/  
Aber nu es neben dem Teufflischen / vnbusfer-  
tigem schandleben / eitel Grewel der Lehr sind /  
dadurch sie den Glauben getilget / Gott vn̄ sein  
Wort zu schanden vn̄ zunichte gemacht haben /  
die Gewissen verführt / die Seelen verdampt / vn̄  
auch noch on alle Buß / vnd on alles auffhören  
solches vben vnd treiben / oder die es nicht dörf-  
fen thun / doch gerne theten / So kan man sie /  
als ein gebrechliche Mutter / in solchem wesen /  
nicht durch die Liebe dulden / sondern mus sie /  
als die abtrünnige Kirche vnd des Teuffels  
Braut / durch des Glaubens öffentlich  
bekentnis / vnd mit dem Wort  
Gottes straffen vnd  
verdammnen.



Qf 2711

ULB Halle

3

004 768 477







# Wider des Bischoffs

zur Raumburg vnchristlich vnd

verfürisch Buch / oder newe I N

TERIM, jetzt dis Jar

zu Cölln im Druck

ausgangen.

*Petrus à Ferrara*

Erste Antwort.

*Seriusst-Anbaltung.*

Ob es denn war sey / wie der Bischoff vnd  
Papisten / ewig vnd on auffhören liegen vnd trie-  
gen / Nemlich / das sie die rechte / alte / Catholi-  
sche / Christliche Kirche sein ?

Item / Ob es den war sey / wie der Bischoff  
vnd die Papisten / ewig vnd on auffhören liegen  
vnd triegen / vnd vns vnd vnserer Lehre damit le-  
stern vnd schenden / Nemlich / das wir Ketzer  
vnd die newe Kirche sein / von der rechten / al-  
ten / Catholischen / Christlichen Kirchen abge-  
fallen / Drum denn auch sie vnd der Bischoff /  
vns Donatisten schelten / vnd Winckelhauffen  
vnd Winckelrotten nennen ?

M. Johannes Pollicarius Pfarher  
vnd Superattendens zu Weissenfels.

M. D. LXII.

